

Siunnersuummut nassuiaatit
Nassuiaatit nalinginnaasut

1. Aallaqqaasiut

Siunnersuut marlunnik imaqarpoq:

- Akuersissummik pigisaqartoq akigititanik nalimmassaanissamik peqquneqarnissaanut inatsimmi tunngavissamik atuutsitsilerneq
- Ajunaalernerni isumannaallisaanikkullu sullissinernut tunngatillugu Namminersorlutik Oqartussat kisermaassisussaataaneranni ilaatinneqanngitsut annertusitinneqarnerat

Akigititanik nalimmassaanissamut inatsimmi tunngavissamik pisariaqartitsinnermut tunngaviusoq

Atuisartoqarnermut aamma Unammilleqatigiinnermut Aqutsisoqarfik

Unammilleqatigiinnermut inatsit tunngavigalugu 2020-mi decembarimi aalajangiivoq, Tusass A/S-ip (siusinnerusukkut TELE Greenland A/S) nunami sumiiffini sumiiffiit assigiinngitsut akornanni akigititanik nalimmassaasinnaajunnaarneranik kinguneqartumik.

Aalajangiinerup sunniutigisaanik Nuummi illoqarfinnilu allani internet-imut attaveqarneq imaatigut kabelimi atassuserneqarsimasoq akikinnerulerpoq. Paarlattuanik inoqarfinni sakkortusaavikkoortumik qaammataasatigoortumillu sullinneqartuni internet akisunerulerpoq. Taamaalilluni inoqarfik aallaavigalugu atassuteqarnermut periarfissaqarnermi aningaasaqarnikkut naligiinnginnerulerneq, aalajangiinerup sunniutigaa.

Nalunaarasuartaateqarnermut suliassaqarfimmi aningaasaqarnikkut nalimmassaasarnerup aalajangiuisimaannarnissaa Naalakkersuisut kissaatigaa. Taamaattumik akigititanik nalimmassaasarnerup ataavartussamik imaluunniit utaqqiisaasumik atorunnaarsinneqannginnissaata qulakkeernissaa siunertaralugu, Naalakkersuisut Aningaasanut inatsimmi oqaasertaliussamik siunnersuuteqarput. Oqaasertaliussaq taanna 2021-mi Aningaasaqarnermut Akileraartarnermullu Ataatsimiititaliamit akuerineqarpoq aammalu 2022-mut, 2023-mut aamma 2024-mut Aningaasanut inatsimmi ingerlateqqinneqarluni. Nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaata allanngortinnissaata matuma siunertaraa aalajangersakkap Inatsisartut inatsisaanni, inissisimaffigisassaani, inissinneqarnissaa.

Atuisartoqarnermut aamma Unammilleqatigiinnermut Aqutsisoqarfiup aalajangiinerata 2020-mi decembarimeersup sunniutai

Kontumut pingaarnermut 72.20.08-mut Nalunaarasuartaatitigut atassuteqarneq, oqaasertaliussami aammalu siunnersuummi matumani aalajangersagaqanngippat, Tusass

nunami sumiiffinni sumiiffiit sisamat makkua akornanni akigititanik nalimmassaasinnaangilaq:

1. Nuuk (Canadamut aamma Island-imut nunani tamalaani imaani kabelimut toqqaannartumik attavilik, taamaalillunilu Nunami namminermi IP-Transit-imik atuinngitsoq).
2. Illoqarfiit Qaqortup aamma Aasiaat akornanni (tassa imaappoq illoqarfiit Qaqortoq, Maniitsoq, Sisimiut aamma Aasiaat) nunami namminermi imaatigut kabelimut toqqaannartumik attavillit.
3. Illoqarfiit nunaqarfiillu sakkortusaavinnut attaveqaasersuutitut atassuserneqartut (tassa imaappoq illoqarfiit Nanortalik, Narsaq, Paamiut, Kangaatsiaq, Qasigiannugit, Qeqertarsuaq, Ilulissat, Ummannaq aamma Upernavik nunaqarfittaalu).
4. Illoqarfiit nunaqarfiillu allat aammalu sumiiffiit Tusass A/S-ip nalunaarasuartaatitigut sullissinernik pilersugai (tassa imaappoq sumiiffiit qaammataasatigoortumik sullinneqartut).

Aalajangiinerup malitsigisaanik Nuummi internet-imut akigititat annertuumik aammalu illoqarfinni imaatigut kabelikkoortumik sullinneqartuni allani annikinnerusumik appassasut, Tusass A/S 2021-mi naliliivoq. Akerlinganilli illoqarfinni nunaqarfinilu sakkortusaavikkoortumik sullinneqartuni aammalu qaammataasatigoortumik sullinneqartuni akigititat annertuumik qaffattussaapput. Akigititat qaffasinnerpaamik qaffannerat qaammataasatigoortumik sullinneqartuni pisussaavoq, taakkunani qarasaasiatigut paasissutissat ingerlaartinneqannut aningaasartuutit Kalaallit Nunaata sinneraniit pingasoriaatip missaannik annertussuseqassallutik. Atugassarititaasut tunngaviatigut 2021-miilli allanngorsimanngillat, taamaalillunilu ullumikkut akigititanik nalimmassaasarnerup atorunnaarsinneqarnerata sunniutissai assigiipajaartussaapput.

Akigititanik nalimmassaanissamut inatsimmi tunngavissamik siunnersuuteqarnermit allaanerusunik periarfissanik misissuineq

Tusass A/S pilersuisussaatitaanermi neqerooruteqartussatut toqqarneqarneratigut ajornartorsiut iluarsiivigineqarsinnaanersoq, oqaasertaliussamut siunnersuutip suliarineqarneranut atatillugu isumaliutersuutigineqarpoq.

Ungasissumut attaveqatigiinnermut akitsuusiinermi aningaasalersorneqartumik, Tusass A/S-ip nalunaarasuartaatitigut kiffartuussinernut pilersuisussaatitaanermi neqerooruteqartussatut toqqarneqarsinnaanera, nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaanni inatsimmi tunngavissaqartoq, Atuisartoqarnermut aamma Unammilleqatigiinnermut Aqutsisoqarfiup aalajangiinerani innersuussutigineqarpoq. Tusass A/S ungasissumut attaveqatigiinnermut akuersissummik pigisaqartuummat, akitsuut nunap karsianut tutsinneqartussaavoq, tamatumalu kingorna politikikkut suliarinnereernermi pingaarnersiureernermilu Tusass A/S-imut tunniunneqartussaalluni.

Ungasissumut akitsuutip ingerlatseqatigiiffiup internet-imut aamma qarasaasiatigut paasissutissanut suliaasaqarfimmi kaaviiartaataasa tamarmiusut 30 aamma 50 %-iata akornanni matussusiisussaassasoq, Tusass A/S 2021-imi naliliivoq.

Pilersuisussaataitanermik aqqissuussisoqassappat, kiffartuussinerit sorliit pilersuisussaataitanermi ilaatinneqassanersut, aammalu qanoq annertussuseqassanersut qanorlu akeqartinneqassanersut, Naalackersuisut isummerfigisussanngussavaat. Taamaalillutik Naalackersuisut aamma Tusass A/S-ip attaveqaasersuutininut aningaasaliinerit sorliit annertunerusut annikinnerusullu ingerlatissaneraat, isummerfigisussanngussavaat. Pilersuisussaataitanerup sullitat internet-imik pisariaqartitsinerisa annertusiartuinnarnerannut malinnaatinneqarnissaa qulakkeerneqassappat, aalajangiinerit taakkua ingerlaavartumik pisartussaapput. Tamatuma kingunerisaanik Tusass A/S-ip periusissiaa aningaasaliinissamullu pilersaarutai pillugit aalajangiinerit pingaernerpaat suliffeqarfimmi siulersuisuniit aqutsisuniillu Naalackersuisunut nuutinneqartussanngussapput. Aningaasaliiffiusussat ataasiakkaat annertuut, ukiorpassuit ingerlaneranni nalingi apparneqartartut, pillugit aalajangiinissaq ajornakusuulertussaavoq.

Naalackersuisut naliliipput ajornartorsiutit taakkua suli atuuttut. Aamma naliliisoqarpoq ungasissumut akitsuut pissusiviusuni Nuummi sullitanit akilersinneqartartussaassaaq, Nuummi niuerfimmi inissisimanerup taamaaginnarneranik kinguneqassasoq, kisianni Nuup avataani sumiiffinni tigusisartuni unammilleqatigiinnermut annertuunik sunniuteqarnerluttussaasoq. Sumiiffinni taakkunani Tusass A/S pilersuisussaataitanermik neqerooruteqartartutut amigartooruteqarnermut akilerneqartartussaassaaq, unammillertaasut tigusanngisaannik, peqatigisaanillu unammillertaasut ungasissumut akitsuummik akileeqaataasalissapput, Tusass A/S-ip sumiiffinni inukinnerusuni amigartooruteqarneranik aningaasalersuutigineqartussanik. Taamaattumik pilersuisussaataitanerup aqqissuussinerimi Nuup avataani unammilleqatigiinneq killilerneqassasoq ilimagineqarpoq.

Tamatuma saniatigut aqqissuussineq Namminersorlutik Oqartussanut aamma Tusass A/S-imut allaffissornikkut nammagassiisussaavoq, tamannalu akileraartartunut nalunaarasuartaateqarnermilu sullitanut immikkut aningaasartuuteqartitsinerimik malitseqartussaalluni.

Ataatsimut isigalugu aqqiissutissaq taanna naapertuutinnigissorineqarpoq.

Nunami ajunaalerneri isumannaallisaanikkullu sullissinerit Namminersorlutik Oqartussat kisermaassisussaataitaneranni ilaatinneqannginnerat

Inatsimmi atuuttumi § 1, imm. 2, nr. 2-mi Namminersorlutik Oqartussat kisermaassisussaataitaneranni ilaatisinnginnerup, nunami ajunaalerneri

isumannaallisaanikkullu sullissinerit ilaaterlugit, annertusitinneqarnissaa naapertuussorineqarpoq.

Teknologiikkut ineriartorneq tunngaviuvoq, imaani nunamilu isumannaallisaanermik pitsanngorsaasinnaasunik qaammataasatigoortumik kiffartuussinerit amerliartornerinik. Kiffartuussinerit taakkua attaveqaqatigiinnermik pingaaruteqartumik ingerlatsinissaq ajornannginnerulersissinnaavaat, taakkunanilu annaassiniarnermik sullissisunut sumiiffiit pillugit paasissutissat eqqornerusut paasissutissiissutigineqarsinnaallutik.

Maannakkut imaani ajunaalernerni isumannaallisaanikkullu sullissinernut killiliisimanerup kingunerisaanik nunami kiffartuussinerit taakkua atornerqarnerat Tusass A/S-imut akuersissummik malinniffiusussaapput. Akuersissut Namminersorlutik Oqartussat kisermaassisussaataitanerannut killeqarpoq, tassami tassani pissutsit kisermaassisussaataitanermi ilaatinneqanngitsut ilaatinneqarsinnaanngimmata. Tusass A/S ajunaalernernut isumannaallisaanernullu siunertanut atornerqarsinnaasumik, qaammataasatigoortumik oqarasuaateqarnermut atuisunngortitsisinnaagaluarpoq, assersuutigalugu ajunaalernermut isumannaallisaanermullu siunertanut tunngatinneqarlutik atortut kiffartuussinerillu, InReach-imik imaluunniit PLB (Personal Locator Beacon) taamaattoq Tusass A/S-ip ingerlatinngilai. Suliffeqarfiup tamanna naapertuussorippagu, Tusass A/S-ip kiffartuussinerinik taakkuninnga ingerlatsisinnaanissaanut, nunami ajunaalernerni isumannaallisaanikkullu sullissinerit Namminersorlutik Oqartussat kisermaassisussaataitaneranni ilaatinneqannginnissaat pillugu aalajangersakkami akornuserneqanngilaq.

Issittumi Sakkutooqarfimmi Kalaallit Nunaannik nakkutiginnittut ilaasortaminnut InReach-inut atortunik atuisuunissamullu neqerooruteqareerput. Siunnersuummi siunnerfigineqarpoq nunami atuinerup inatsisitigut periarfissaqalersinnissaa.

2. Siunnersuummi immikkoortut pingaarnertit

TELE Greenland A/S-imut akuersissut pillugu Namminersornerullutik Oqartussat nalunaarutaat naapertorlugu Tusass A/S akuersissummik pigisaqartutut, kiffartuussinernut akuersissuteqarfigineqartunut nunami sumiiffinni akigititanik nalimmassaanissamik peqquneqarsinnaavoq. Aalajangersakkami suleriaaseq 2021-mi Aningaasanut inatsimmi oqaasertaliussamik ilanngussilluni atuutsinneqalersoq, aammalu 2024-mut Aningaasanut inatsimmi kontumut pingaarnermut 72.20.08-imut Nalunaarasuartaatitigut atassuteqarneq, oqaasertaliussami nr. 1-imi ingerlateqqinneqartoq, pisortatigoortumik malittarisassanngortinneqarpoq. Naalakkersuisut siunnersuummik atuutsitsilernissaanut nalunaarummut missingiummik, Inatsisartut inatsisaata atuutilernerata peqatigisaanik atuutilertussamik, suliaqarsinnaapput.

Siunnersuummi aamma oqaaseq ”ajunaalernerni isumannaallisaanikkullu sullissinerit” nunami ajunaalernerni isumannaallisaanikkullu sullissinerit ilaaterlugit, aammalu imaani sumiiffiit kisimik ilaatinneqarunnaarlutik, aamma annertusitinneqarpoq.

3. Pisortanut aningaasaqarnikkut allaffissornikkullu sunniutaasussat

Akigititanik nalimmassaanissaq pillugu siunnersuummut siunertaavoq, 2024-mut Aningaasanut inatsimmi kontumut pingaarnermut 72.20.08-imut, Nalunaarasuartaatitigut atassuteqarneq, oqaasertaliussap nr. 1-ip, nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaanni ilanngunneqarneratigut, suleriaatsip atuuttup pisortatigoortumik malitassanngortinneqarnissaa. Taamaalilluni suleriaaseq atuuttoq, inatsimmi ingerlateqqinneqanngikkuni, ukiumut aningaasaliiffiusumut pineqartumut taamaallaat atuuppoq.

Akigititanik nalimmassaanissaq pillugu siunnersuutip malitsigisaanik Nuummi nalunaarasuartaatitigut atassuteqarnermut pisortat aningaasartuutai sakkortuumik appariassanngillat, aammalu sumiiffinni sakkortusaavikkoortumik qaammataasatigoortumillu sullinneqartuni nalunaarasuartaatitigut atassuteqarnermut aningaasartuutit sakkortuumik qaffariartussanatik. Taamaalilluni siunnersuummi Avannaata Kommuniani aamma Qeqertallip Kommuniani nalunaarasuartaatitigut atassuteqarnermut aningaasartuutit qaffannissaat pinngitsoortinneqarpoq. Siunnersuut ataatsimut isigalugu Kommune Kujallermi, Kommuneqarfik Sermersuumi, Qeqqata Kommuniani aamma Namminersorlutik oqartussani nalunaarasuartaatitigut atassuteqarnermut aningaasartuutininik annertusititsissanersoq imaluunniit annikillitsitsissanersoq nalilerneqarsinnaanngilaq, tassami taakkunani kommunini ingerlatsiviit amerlanersaat imaatigut kabelikkoortumik sullinneqarmata.

Oqaatsip ”ajunaalernerni isumannaallisaanikkullu sullissinerit”, nunami ajunaalernerni isumannaallisaanikkullu sullissinerit ilaaterlugit annertusitinneqarnissaa pillugu siunnersuut, illoqarfiit nunaqarfiillu avataanni nunami angalaarnermi ajunaalernerni isumannaallisaanikkullu sullissinernik atuinerulersitsinissamut periarfissiivoq. Naatsorsuutigineqarpoq tamanna pisariaqanngitsumik ujaasinernik pinngitsoortitsinnaassasoq aammalu ujaasinernik sunniuteqarluarnerulersitsissasoq.

4. Inuussutissarsiortunut aningaasaqarnikkut allaffissornikkullu sunniutaasussat

Siunnersuummut siunertaavoq 2024-mut Aningaasanut inatsimmi kontumut pingaarnermut 72.20.08-mut, Nalunaarasuartaatitigut atassuteqarneq, oqaasertaliussap nr. 1-ip, nalunaarasuartaatitigut atassuteqarneq nalunaarasuartaatitigullu kiffartuussinerit pillugit Inatsisartut inatsisaanni ilanngunneqarnissaa.

Siunnersuutip malitsigisaanik inuussutissarsiortut sumiiffinni sakkortusaavikkoortumik qaammataasatigoortumillu sullinneqartuni nalunaarasuartaatitigut atassuteqarnermut

anigaasartuutaat sakkortuumik qaffassanngillat aammalu nunami sumiiffinni akigititanik nalimmassaanerup atorunnaarnera pissutigalugu Nuummi sakkortuumik annikillissanatik.

Siunnersuummi allanngortoqannginnera ingerlatiinnarneqarmat, siunnersuut inuussutissarsiortunut aningaasaqarnikkut allaffissornikkullu sunniuteqassanganineqanngilaq.

Siunnersuut allanngortoqannginneranut sanilliullugu Tusass A/S-imut aningaasaqarnikkut allaffissornikkullu sunniuteqassanngilaq, tassami nunami sumiiffinni amigartooruteqarfiusuniit sumiiffinnut sinneqartooruteqarfiusunut aningaasanik nuussinissamik sulii pisussaaffilerneqarsinnaammat.

Akigititat qaffasinnerulernerat ujartuinnermut sunniuteqarnerluttarmat, Tusass A/S-ip sumiiffinni sakkortusaavikkoortumik qaammataasatigoortumillu sullinneqartuni nalunaarasuartaatitigut attaveqaasersuutinik aserfallatsaaliuinissamut ineriartortitsinissamullu aningaasassaqaannarnissaa siunnersuummi qulakkeerneqarpoq.

Oqaatsip ”ajunaalernerni isumannaallisaanikkullu sullissinerit”, nunami ajunaalernerni isumannaallisaanikkullu sullissinerit ilaaterlugit annertusitinneqarnissaa pillugu siunnersuut inuussutissarsiortunut aningaasaqarnikkut allaffissornikkullu sunniuteqassanganineqanngilaq.

5. Avatangiisinut, pinngortitamut inuillu peqqissusaannut sunniutaasussat

Akigititanik nalimmassaanissaq pillugu siunnersuut avatangiisinut pinngortitamullu sunniuteqassanngilaq.

Naatsorsuutigineqarpoq akigititanik nalimmassaasarnerup ingerlatiinnarneratigut, inuit peqqissusaannut iluaqutaasumik nalunaarasuartaatitigut nakorsartitsisarneq ingerlatiinnarneqarsinnaasoq, peqqinnissaqarfik nalunaarasuartaatinik atuisunnorgornissamut annertunerusunik aningaasaliiffisariaqassanani.

Oqaatsip ”ajunaalernerni isumannaallisaanikkullu sullissinerit”, nunami ajunaalernerni isumannaallisaanikkullu sullissinerit ilaaterlugit annertusitinneqarnissaa pillugu siunnersuut, qaammataasatigoortumik ajunaalernerni isumannaallisaanikkullu sullissinerit atorneqarnerulernissaannut periarfissiivoq, tamannalu illoqarfiit nunaqarfiillu avataanni nunami angalaarnermi isumannaallisaanermik annertusititsissaaq.

6. Innuttaasunut sunniutaasussat

Siunnersuutip malitsigisaanik nalunaarasuartaatitigut atassuteqarnermut akigititat sumiiffinni sakkortusaavikkoortumik qaammataasatigoortumillu sullinneqartuni sakkortuumik qaffassanngillat aammalu Nuummi sakkortuumik annikillissanatik.

Oqaatsip ”ajunaalernerni isumannaallisaanikkullu sullissinerit”, nunami ajunaalernerni isumannaallisaanikkullu sullissinerit ilaatilerlugit annertusitinneqarnissaa pillugu siunnersuut, innuttaasunut pitsaasunik sunniuteqassaaq, tassami taanna nunami angalaarnermi innuttaasunut isumannaannerulersitsisussaammat.

7. Sunniutaasussat annertuut allat

Siunnersuut allanik annertuunik sunniuteqassanngilaq.

8. Oqartussanut kattuffinnullu il.il. tusarniaaneq

Siunnersuut piffissami X. qaammat 2024 - 29. Y. qaammat 2024 tusarniaaffigineqartuni makkunani tusarniaassutigineqarpoq:

Naalakkersuisut Siulittaasuata Naalakkersuisoqarfia
Aningaasaqarnermut Akileraartarnermullu Naalakkersuisoqarfik
Naalagaaffinngornissamut Nunanullu allanut Naalakkersuisoqarfik
Aalisarnermut Piniarnermullu Naalakkersuisoqarfik
Isumaginninnermut, Ilaqutariinnut, Suliffeqarnermut Nunamullu Namminermt
Naalakkersuisoqarfik
Ilinniartitaanermt, Kultureqarnermut, Timersornermt Ilageeqarnermullu
Naalakkersuisoqarfik
Aatsitassanut Inatsisillu Atuutsinneqarnerannut Naalakkersuisoqarfik
Nunalerinnermt, Imminut Pilersornermt, Nukissiutinut Avatangiisinullu
Naalakkersuisoqarfik
Meeqqanut Inuusuttunullu Naalakkersuisoqarfik
Peqqinnissamut Naalakkersuisoqarfik
Nalunaarasuartaateqarnermt Aqutsisoqarfik
Digitalinngortitsinnermt Aqutsisoqarfik
Kommune Kujalleq
Kommuneqarfik Sermersooq
Qeqqata Kommunia
Kommune Qeqertalik
Avannaata Kommunia
KANUNUPE
Nusuka
Sulisitsisut
Tusass A/S
Comby A/S
Greenland Television (GTV)
Nanoq Media
Inu:It
Ilisimatusartut attaveqarfiit

Aasiaat Radio
Arktisk Kommando

Tusarniaaneq aamma tusarniaanermut akissuteqaatit tiguneqartut pillugit ilanngussaq 2
innersuussutigineqarpoq.

Tamatuma saniatigut siunnersuut ulloq **Z. qaammat** 2024 Naalakkersuisut tusarniaanermut
nittartagaanni tamanut saqqummiunneqarpoq.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut.

Oqaaseq "imaatigut" peerneqarpoq, taamaalillunilu ajunaalernerni isumannaallisaanikkullu sullinneqartut annertusitinneqarlutik, taamaalilluni tamanna aamma nunami atuutilerluni. Ajunaalernerni isumannaallisaanikkullu sullissinerit taamaalillutik imaani imaluunniit nunami atornerarnerat pineqarnerisq apeqqutaatinnagu Namminersorlutik Oqartussat kisermaassisussaataaneranni ilaatinneqangillat.

Ajunaalernerni isumannaallisaanikkullu sullissinerni ilaatinneqarpoq VHF-imik, MF-imik, HF-imik, PLB-imik, Inmarsat C-imik, Iridium-imik imaluunniit Inreach-imik atuineq. Tamatumani ilaatinneqarpoq sinerissami raatiukkut sullissineq, danskit naalagaaffiannit isumagineqartoq.

Ajunaalernerni isumannaallisaanikkullu sullissinerit siunertaminni nassuiaaserneqartarput. Taakkua ajunaalernermi kalerrisaarinnermut imaluunniit ajornartoorluni inissisimanerit upalungaarsimanermilu pisut pinngitsoortinnissaannut atugassatut naatsorsuutigineqartussaapput. Tassaasinnaavoq tassanngaannartumik ajornartorsiorluni pisoqarnera imaluunniit ingerlaarnermut paasissutissanik piniarneq pillugit annaassiniarnermut oqartussanik aggersaaneq. Tassani aamma pineqarput, annaassiniarnermut sullissisut pisariaqanngitsumik sulilersinnissaannik pitsaaliuinissaq siunertaralugu, kinguaattoornerit imaluunniit pilersaarutit allanngornerat pillugit ilaqutaasut imaluunniit allat attaveqarfiit ilisimatinnissaat.

Nr. 2-mut.

Aalajangersakkami aalajangersarneqarpoq, sullissinernut akuersissuteqarfigineqarsimasunut nunami sumiiffinni akigititanik nalimmassaaqqullugu Naalakkersuisut akuersissummik pigisaqartoq peqqusinnaagaat. Attaveqaasersuutininik akuersissuteqarfigineqarsimasunik aammalu sullissinernik akuersissuteqarfigineqarsimasunik sanaartukkanut ingerlatsinermullu aningaasartuutit isertitanit annikinnerusimappata, nunami sumiiffinni sumiiffinnut attaveqaasersuutininik akuersissuteqarfigineqarsimasunik aamma sullissinernik akuersissuteqarfigineqarsimasunik sanaartornermut ingerlatsinermullu isertitanit qaffasinnerusumik aningaasartuuteqarfiusartunut, akuersissummik pigisaqartup nunami sumiiffinni sumiiffinniit isertitanik nuussineratigut, akigititanik nalimmassaaneq pissaaq.

Akigititanik nalimmassaaneq taamaallaat sullissinernut ataasiakkaanut immikkoortumik pissaaq aammalu sullissinerit akornanni pissanani.

Illoqarfinni nunaqarfinnilu tamaginni assigiimmik sullissinermut assigiimmik
akeqartitsissasoq, Naalakkersuisut akuersissummik pigisaqartoq peqqusinnaavaat.

Akigititanik nalimmassaaneq annertuukkaanik sullissisuni pissaaq.

§ 2-mut

Inatsisartut inatsisaat 1. januar 2025 atuutilerpoq.

Siunnersuut inatsimmut atuuttumut sanilliullugu	
<i>Oqaasertai atuuttut</i>	<i>Siunnersuut</i>
	<p style="text-align: center;">§ 1</p> <p>Nalunaarasuartaatitigut atassuteqarneq nalunaarasuartaatitigullu kifartuussinerit pillugit Inatsisartut inatsisaanni nr. 31, 23. november 2017-imeersumi, makkua allanngortinneqarput:</p>
2) imaatigut ajunaalernerni isumannaallisaanikkullu sullissinerit.	<p>1. § 1, imm. 2, nr. 2, imatut oqaasertalerneqarpoq: ”2) ajunaalernerni isumannaallisaanikkullu sullissinerit.”</p>
	<p>2. § 5 kingorna ilanngunneqarpoq: ” § 5 a. Naalakkersuisut akuersissummik pigisaqartoq § 5 naapertorlugu sullissinerni akuersissuteqarfiusuni nunami sumiiffinni akigititanik nalimmassaanissamik peqqusinnaavaat.”</p>
	<p style="text-align: center;">§ 2</p> <p>Inatsisartut inatsisaat ulloq 1. januar 2025 atuutilerpoq.</p>

Tusarniaanermut allakkiaḡ

Siunnersuut piffissami ... tamanut ammasumik tusarniaassutigineqarpoḡ.

Siunnersuut kattuffinnut suliffeqarfinnullu makkununga nassiunneqarpoḡ: